



AWTG-AWTG

DESA ADAT DENCARIK

KECAMATAN BANJAR

KABUPATEN DAERAH TINGKAT II BULELENG



TAHUN 2002

MURDHA - CITTA

Om Awighnamastu nama siddham,

Putusing paseban Krama Deasa Adat Dencarik gumawe Awig - awig Desa Adat sekadi inucap ring Perda. Tk. I Bali No. 6 Th. 1986 pitwi wantah nabdab kasukertan adat sane wenten ring Desa adat soang - soang.

Kasukertan Desa Adat, inggihan ngeninin kasukertan tata pakraman, kasukertan tata pawongan miwah kasukertan tata agama, dumugi prasida bareng mikukuhin kasukertan jagat minakadi Negara Republik Indonesia sajeroning matitis masyarakat adil makmur, gemah ripah loh jinawi tata tentram kerta raharja.

Wit sangkaning asung kerta wara nugraha Ida Sang Hyang Widhi, Desa Adat Dencarik prasida ngardi awig - awig, sane maka sepat siku, titi pangancan lan pamatut sajeroning nabdab kasukertan Desa Adat Dencarik

PRATHAMAS SARGAH ARAN LAN WIDANGAN DESA

Pawos 1

- 1). Desa Adat puniki mewasta Desa Adat Dencarik
- 2). Jebag kekuwub wewidangannya mewates nyatur :
 - ha. Sisih wetan : Desa Temukus lan Desa Cempaga
 - na. Sisih kulon : Desa Banjar
 - ca. Sisih lor : Segara
 - ra. Sisih kidul : Desa Banjar Tegcha, Desa Tampekan lan Desa Sidatapa

3). Desa Adat Dencarik kepah dados 5 (limang) Banjar, luire :

ha. Banjar Bajangan
(Ersania)

na. Banjar Corot
(Purwa)

ca. Banjar Baingin
(Genia)

ra. Banjar Menasa
(Neriti)

ka. Banjar Lebah
(Wayabia)

DWITIYASARGAH PATITIS LAN PAMIKUKUH

Pawos 2

Desa Pakraman Dencarik ngenianggehang pamikukuh minakadi

- (1). Pancasila
- (2). Undang - undang Dasar 1945
- (3). Tri Hita Karana manut sada cara Agama Hindu

Pawos 3

Luwir patitis Desa Pakraman Dencarik

- (1). Ngukuhang miwah ngerajegang Agama Hindu
- (2). Nginggilang tata prawertine meagama
- (3). Ngerajegang Kasukertan Desa saha Pawongannya sekala lan niskala

TRITIYASARGAH SUKERTA TATA PAKRAMAN

Palet 1

Indik Krama

Pawos 4

- (1). Kulewarga wit krama Desa Dencarik, kecihna wenten merajan / sanggah dadia tur ngemong karang ayahan desa, kesinanggeh kerama Desa Negak.
- (2). Keluarga sane meagama Hindu sampun merabian, ngelinggihin karang ayahan Desa wiadin karang mapipil, saha nyungsung kahyangan desa kasinanggeh krama roban.
- (3). Siyos punika sinanggeh tamiyu.

Pawos 5

Krama Desa Pakraman wenten 3 (tigang) soroh

(1). Krama ngarep

ha. Krama ngarep wit inggih punika krama sane mawiwit saking wed Desa Dencarik, tur jumenek ring Desa Dencarik.

na. Krama ngampel inggih punika krama ngarep sane magenah ring dura Desa / Selat pasih.

(2). Krama pahro nyada, inggih punika krama sane sampun wenten sumendi.

(3). Krama penyada, inggih punika krama sane sampun lepas ayah kagentos antuk sentanannya.

Pawos 6

(1). Ngawit dados krama Desa inggih punika ;

ha. Sangkaning sampun jumenek ring Desa Dencarik

na. Mawiwit saking pawiwahan

ca. Saking ngatur Upeksa ring Desa Pakraman Dencarik, saha makta ilikita saking Guru Wisesa, dwaning ngerereh pengupa jiwa tur jenek malinggih ring Desa Pakraman Dencarik

(2). Penemaya tedun Mekrama Desa Pakraman

ha. Ngawit magenah utawi ngelinggihin karang ayahan Desa

na. Mawit saking pawiwahan asasih sesampun upacara Widi Widana

ca. Sangkaning mawit ngerereh pangupa jiwa, tur sampun nawur penanjung batu manut pararem

Pawos 7

Tategenan :

(1). Sahanan krama Desa sami kakeninin tetegenan marupa ayah-ayahan, urunan, papeson, sajaba krama nyada

(2). Balu :

ha. Balu lanang : masentana istri tur sampun daha mewali dados ayahannya luput kewanten keni' paturunan apahro, balu lanang masentana lanang tur sampun taruna patut keni ayahan urunan ngarep, nanging banten luput.

na.

- na. Balu istri : masentana istri tur sampun daha, patut ayahan nyane kaluputang, sakewanten banten keni, urunan luput. Balu istri masentana lanang tur sampun taruna, patut kekenini urunan apahro, banten keni, ayahan nyane luput.
- (3). Krama pahro nyada, tetegannia luire : banten luput, ayahan luput, paturunan keni apahro.
- (4). Prade rikalaning ngayan, wenten sinalih tunggil krama matilar sadurung puput karya, wenang krama inucap keni pamidanda manut pararem, tajek laler kewastanin.

Pawos 8

Krama Desa Pakraman kedadosang (mapewangkid) luire :

- (1). Mapuankid mepiteges nyupeksa tan sida tedun ngayah :
- ha. Newasain wewangunan
 - na. Miyadnya
 - ca. Sungkan
 - ra. Matepetin
 - ka. Dedauhan saking Pemerintah
 - da. Leluasan wantah tempo apisan, sejaba wenten uwakan saking Prajuru, manut kabuatan.
- (2). Prade mayusa 60 tahun
- (3). Krama ngampel : Krama sane magenah ring dura desa, nutug ayahan muang peson antuk jinah manut pararem

Pawos 9

Swadarmaning Krama Desa :

- (1). Patut satinut ring daging awig - awig muwah pararem Desa.
- (2). Patut nyupeksa ring prajuru prade :
- ha. Ngewarangang
 - na. Kelayu sekaran (kepademan)
 - ca. Kembasan oka
 - ra. Nampi tamiyu jantos makolem, sanistanya arahina
 - ka. Kapancabaya
 - da. Palas marabi

Pawos 10

Wusan dados krama Desa sangkaning :

- (1). Pinunas ngeraga, kesah kedura desa
- (2). Kenorayang (keusanang) duaning sampun tan presida ngehehin solah maprewerti setata nguwug kecaping awig - awig
- (3). Seda

Pawos 11

Sang wusan makrama patut :

- ha. Ngewaliang karang ayahan Desa
- na. Tan polih pahpahan saking padruwen Desa
- ca. Tan polih pasubayan pasukertan
- ra. Patut muputang hutang-piutang Desa

Palet 2

Indik Prajuru

Pawos 12 ✓

- (1). Desa Pakraman Dencarik keenter antuk Bendesa Adat
- (2). ha. Banjar keenter antuk Kelian Banjar
na. Tempek keenter antuk Kelian Tempek
- (3). Bendesa patut :
 - ha. Mawiwit saking krama desa
 - na. Keadegang melarapan antuk krama olih paruman nyabran 5 (limang) warsa sejawanibg wenten parindikan teos, dados kapilih malih apisan
- (4). Kadulurin antuk Dewa saksi ring Pura Desa Puseh Dencarik

Pawos 13

- (1). Bendesa Adat kesanggra antuk :
 - ha. Petajuh utawi pengeliman pinaka wakilnya
 - na. Penyarikan pinaka juru surat
 - ca. Patengen pinaka pangemong druwen desa
 - ra. Pecalang pinaka ngerajegang kasukertan
 - ka. Kasinoman pinaka juru arah
 - da. Desa Negak
 - ta. Kertha Desa

- (2). Kasinoman akeh nia manut kawigunan
- (3). Ritatkala ngemargiang kasukertan niskala Bendesa Adat mesinggihang Pemangku Kahyangan Desa.

Pawos 14

- (1). Swadarmaning Prajuru Desa Pakraman
 - ha. Ngenterang pemargin daging awig-awig, paswaran miwah perarem-perarem Desa Pakraman Dencarik
 - na. Nuntun saha nyaksinin upakaraning kauripan memuat sane ngilitang sulur / pakulawargan
 - ca. Nuntun tur ngeterang Krama ngulati anut patitis
 - ra. Makeduta (utusan) matemuang bawos ring sapa sira ugi
 - ka. Mawosin kalih niwakang pamutus marep ring wicara Krama Desa Pakraman
 - da. Nuntun upakara - upakara agama ring Desa Pakraman manut kecap Castra agama
 - ta. Ngutsahayang kasukertan lan muputang wiara (sengketa - sengketa) adat
 - sa. Nabdab lan nuntun kawigunan arta padruwen Desa.

- (2). ha. Prade wenten prajuru nilar sesana kengin keusanang tur patut keni danda manut paswaran pararem.
- na. Ageng malit pamuruge tur dedandan sane pacang katiwakang manut pamutus prarem
- ca. Kagentosin antuk Panglimannya, mawates enem sasih.

Pawos 15

Petuas (ulih-ulihan) Prajuru :

- (1). Leluputan ayahan muang pepeson
- (2). Saluiring sesari ritatkala ngemargiang upacara ring Kahyangan Desa patut kaepah tiga, luire : Pemangku, Prajuru, lan bebau Desa
- (3). Muang sane seosan manut pararem

Pawos 16

Prajuru Desa Pakraman kagentosin riantuk :

- ha. Kapunggelang yusa
- na. Pinunas ngeraga sesampun kelokika saking paruman Desa
- ca. Mamurug sesana Prajuru

Palet 3
Indik Kukul
Pawos 17

- (1). Kukul ring Desa Pakraman Dencarik :
 - ha. Kukul Desa Pakraman
 - na. Kukul Banjar Pakraman
 - ca. Kukul Seka - seka (Suka Duka / Subak)
 - ra. Kukul Pondokan
- (2). Tabuh tatepakan kukul Desa Pakraman manut dresta :
 - ha. Maswara nabuh nganutin wirama, sadurungnya cihna wenten dedawuhan pacang ngayah wiadin sangkep
 - na. Maswara ngoncang atuludan cihna wenten upacara agama ring Desa Pakraman
 - ca. Maswara bulus gati atuludan cihna wenten kepancabaya
- (3). Kukul Desa tan wenang ketepak yan tan sangkaning pituduh prajuru, sejawaning tenger cihna kepancabaya
- (4). Kukul Banjar miwah pondokan - pondokan tan patut matehin sukat kukul Desa, yan mamurung wenang kapidanda manut prarem tur kukul katedunang.

Palet 4
Indik Paruman Desa
Pawos 18

- (1). Paruman ring Desa Pakraman Dencarik wenten 5 (limang) soroh :
 - ha. Paruman Desa Negak
 - na. Paruman Desa Pakraman
 - ca. Paruman Banjar Pakraman
 - ra. Paruman Prajuru / Pamucuk - pamucuk Desa Pakraman / Pecalang
 - ka. Paruman Daha Taruna
- (2). Paruman Desa Negak kelaksanayang anut ring kabuatan muang kawigunan
- (3). Paruman Desa Pakraman kawenangang nyabran :
 - ha. Nigang sasih apisan rikala manis buda kliwon
 - na. Nangken pacang ngawentenang puja wali ring Kahyangan Desa, parumannya ring Kahyangan Desa inucap.
 - ca. Padgata kala manut kagunannya
 - ra. Paruman agung rikala ngembak geni apisan ✓

(4). Paruman Desa manut dudonan ring sor :

- ha. Prasida lumaksana risampun jangkep sang ngamiletin saha mabusana adat, tan kengin makta gegawan
- na. Pengawit kelaksanayang penyacah sepsepan, sahariusan peparuman
- ca. Pamutus kautsahayang melarapan paswara gilik saguluk. Bilih - bilih tan kasidan malih kapuputang antuk paswara katahan etangan nie kalih pah tiga (2/3) kerama sane rawuh.
- ra. Tan maren manggala ngarcana ring Ida Begawan Penyarikan makesarana widi widana cane (manut ring Pura Desa Puseh).

Pawos 19

(1). Sajeroning paruman Desa Pakraman, Bendesa patut nyiarang pemargin ngenterang Desa mekadi indik :

- ha. Munjuk lungsuring pakraman saha ayah-ayahan, sulur arta brana druwen desa miwah selanturnya.
- na. Rerancangan Prajuru ngeninin usaha desane kapungkur
- ca. Sahanan wicara saha pamutusnia

(2). Sahanan sane sekirang ring ajeng katitenin saha katiwakin pemutus antuk paruman

(3). Pamutus paruman Desa sinanggeh perarem maka pamitegep pemargin awig-awig

Pawos 20

(1). Paruman Prajuru patut :

- ha. Kawentenang tigang sasih apisan, bilih-bilih asasih, manut kawigunania muah padgata kala
- na. Kesarengin antuk Prajuru Desa / Banjar saha pamucuk - pamucuk ring Desa prade kapisaratang kerawuhania.

(2). Paruman Desa Negak wantah kengin ngericikang usaha Desa kapungkur

(3). Ring sangkepan prajuru wenang ngonekang pasuara saking Amangkurat tur ngonekang paruman Desa pecak.

(4). Prade paruman tan keigumin / keingkupin jantos ping tiga ring paruman selanturnya wenang niwakang pamutus.

Palet 5
Indik Druwen Desa
Pawos 21

Padruwen Desa Pakraman Dencarik sekadi ring sor :

- (1). Kahyangan Desa
Kahyangan tiga luire :
 - ha. Pura Desa Puseh, sane magenah ring Banjar Menasa Desa Pakraman Dencarik
 - na. Pura Dalem sane magenah ring palemahan Desa Banjar
- (2). Bale Desa Dencarik magenah ring Banjar Bajangan ✓
- (3). Pasar magenah ring Banjar Bajangan
- (4). Tanah pelaba luire :
 - ha. Druwen Pura Desa Puseh melinggah : 0,090 Ha. Persil No. Dp. 71
 - na. Tegak Pura Desa Puseh melinggah 0,130 Ha
- (5). Setra sane magenah ring wewidangan Desa Banjar keanggen olih :
 - ha. Desa Pakraman Dencarik, Banjar, lan Desa Pakraman Br. Tegeha
 - na. Setra Alit magenah ring Desa Banjar keanggen antuk Desa Dencarik
- (6). Ilen - ilen ring Desa, sane mewasta rejang
- (7). Genah melasti sane magenah ring wewidangan Br. Bajangan

Pawos 22

Olih - olihan Desa Pakraman

- (1). Polih - olihan saking pelaba Pura, rauh pasar Desa Pakraman Dencarik ✓
- (2). Urunan saking Krama Desa Pakraman
- (3). Paica saking Guru Wisesa
- (4). LPD.
- (5). Paica - paica sane siosan, utama dana punia sane melarapan sane patut

Pawos 23

- (1). Prajuru / Dulun Desa patut ngetangang sahanan druwen Desa
- (2). Nyabran pesangkepan Desa, Dulun/Pangemong Druwe, ngawentenang perindik munjuk lungsuring padruwen ring Krama Desa
- (3). Sekeluring padruwen Desa patut wenten ilikjitanya
- (4). Tan kalugra ngadol utawi ngesahang padruwen Desa yan tan kasungkemin antuk Krama Desa.

Palet 6

Sukertan Pmitegep

Kaping 1

Karang lan Tegal

Pawos 24

- (1). Krama Desa pangemong karang padadyanan patut ngawatesin antuk pagehan / turus utawi tembok mangda pekantenannya sari tur nyata wates pangemong nyane soang - soang.
- (2). Wates sisi kaler miwah kangin patut kekaryanin antuk sang ngamong karang inucap, punika sane mewasta gegaleng keluan.
- (3). Taler tegal utawi carik miwah tanah padruwen ngeraga, wates ring sisi kelod miwah kawuh patut kekaryanin wates olih sang neruwenang tanah inucap tur punika sane mewasta gegaleng keteben
- (4). Prade kerasayang pagehan utawi turus inucap ngelikadin yan pada arsa penyanding, kengin batese nganggen pinget kewanten kesaksi antuk Prajuru / Dulun Desa utawi precihna pal.
- (5). Utsahayang mangda tan wenten karang kabebeng

Pawos 25

- (1). Sinalih tunggil Krama Desa / Banjar tan kawenanggang :
 - ha. Ngalah - alah margi, tegal, carik, karang Desa lan karang ayahan Desa
 - na. Ngalah - alah tanah tegak kahyangan, setra lan sekancan tegak sinanggah suci
 - ca. Ngadol tanah ayahan Desa
 - ra. Ngembahang toya wit bada wewalungan, pasiraman, kakus, pewaregan utawi sane tiosan ke pekarangan, kemargine utawi kepumahan krama tios

- ka. Nanem wangke wewalungan, tan kawenangang tiosan ring setra
- (2). Perade wenten kerama Desa Adat sekadi ring ajeng, wenang keni pamidanda sekadi ring sor :
- ha. Patut ngewaliang sane kelahlah miwah danda manut perarem
- na. Sejaba danda sekadi dandaning ring ajeng taler maweweh penyanggaskara tanah kahyangan sane kelahlah
- ca. Patut nyampetin utawi ngaryanang pemargin toya sumeken

Kaping 2

Pepayonan

Pawos 26

- (1). Ngawit nandur tanem tuwuh patut adepe agung (2,5) meter ngajeroang saking wates tur perade jantos ngeliwat bates wenang kasepat gantungin.
- (2). Yening wenten tetanduran ngukubin, semaliha mewastu mayanin kapisaga patut kewara antuk paiguman ping ajeng mangda presida sang neruwenang wit ngerebah utawi notor
- (3). Perade sampun kewara taler tan wenten usaha sang neruwenang wit, sang kajerihang wenang ngadokang ring prajuru / Dulun Desa
- (4). Yening jantos ping tiga nyadokang ring Prajuru taler durung kerebah, sang nyaduang wenang ngerebah taru inucap yening sampun kesaksi antuk Prajuru, tur patin pepayonan inucap patut kedruwe olih Desa.

Kaping 3
Wewangunan
Pawos 27

- (1). Nyabran ngewangun patut :
 - ha. Nganggo astabumi miwah gagulak saha asta kosala - kosali senistane manut ring patitis niskala
 - na. Krama Desa sane pacang ngewangun patut ngawentenang atur ring Prajuru Banjat / Desa Adat, sadurung kadadosang tan kergin ngewangun
 - ca. Tan patut ngayubin kapisaga
 - ra. Wates wewangunan adepe saking tepian margi
- (2). Prade wewangunan jantos nyayubin, bilih - bilih temboke ring telenging wates tur risampun kewara ring sang madruwe, wenang :
 - ha. Kesadokang ring sang Prajuru
 - na. Kapidanda manut wewanengan perarem. Saha tembok inucap kegubar olih sang maderuwe tur tan polih prebeya
 - ca. Yening wates wewanengan inucap sampun jangkep taler wewangun inucap durung kegubar, wenang ketangenin olih Krama Desa Adat
- (3). Ngewangun wewangunan sane matumpang yening nyanding genah suci, masengker adepe agung (1,5 meter) sejawaning wewangunan sane matumpang inucap keanggen genah suci.
- (4). Saluiring wewangunan Pura wenang keideran antuk margi

Kaping 4
Wawalungan
Pawos 28

- (1). Krama Desa sane miara saluiring wewalungan patut sayaga negul utawi ngelogor mangda tan medal kemargine ngerusakin karang utawi pabianan krama teos.
- (2). Yening wenten wewalungan sane melumbar ngerusakin ring druwen krama desa seos patut ketaban tur mapiorah ring Prajuru masengker 3 (tigang) rahina, rahina

selanturnyane pacang keadol anggen naur prabea tetandurane sane karusak, biaya mamiara, kedanda manut perarem.

(3). Yening wewalungan ngerusak tegak Kahyangan utawi genah suci patut keni pamidanda miwah prabea upacara pamarasista manut dresta.

(4). Krama Desa tan kawenangang ngangon ring :

ha. Palemahan Pura / Kahyangan Tiga

na. Pura Panti / Dadia miwah genah - genah sane sinanggeh suci

ca. Pagehan utawi wates tegal, karang muah carik

ra. Pundukan carik

ka. Carik, tegal lan abian

da. Sisin margi utawi sisin telabah

ta. Setra

sa. Genah druwen Desa

Kaping 5

B h a y a

Pawos 29

(1). Perindikan bhaya luire :

(2). Sang manggihin kahanan bhaya, patut nepak kulkul mapitulung

(3). Perade ring Desa kahanan jiwa bhaya, patut desane ngaturang pamarasista manut dresta, tur sang mayanin katur ring ngawe wenang

(4). Perade wenten krama mamisuh utawi nguman - uman, krama siosan patut kawara, tur keninin marupa pecamil.

Pawos 30

(1). Sang manggihin kahanan artha bhaya (kemalingan) patut ngulkul mapitulung, utawi sang kemalingan matur supeksa ring Prajuru / Dulun Desa sane pacang nimbangin utawi nandainin anut daging KUHP saha miawuwuh penyangaskara perade wenten jadma ngemaling barang senanggeh suci.

- (2). Pratingkahe mapailon ring dusta kebawos saruron, perade wenten jadma nyaduang patut keni danda kadi dandaning maling, akeh dandan ipun manut pararem krama Desa Adat, tur kesukserah ring sang ngawe wenang.
- (3). Prade wenten jadma ngerereh reramon, minekadi daun kelapa, ron tan pesadok ring sang neruwenang wit, perade kacunduk (ketara) patut keni danda dandaning maling.
- (4). Yening wenten jadma ngeranjingin pekubon yadin pikarangan rikala suwung mewastu sang maderuwe karang keicalan, wenang jadma inucap katuwekang antuk madewa saksi ring Pura Desa Puseh.
- (5). Mangde tan katuwekang manut ring ajeng, asing - asing ngeranjing kubon jadma tios patut :
 - ha. Matengeran suara (makaukan)
 - na. Nyantos sang neruwenang karang rauh utawi mesadok ring pengapit pinih nampek, makebuatan pengeranjinge.
 - ca. Pamedal karangnia kedagingin sawen, makecihna pengarah rikala suwung.

Kaping 6

Panyanggran Banjar

Pawos 31

Krama Desa rikala ngawentenang karya Suka Duka patut kesanggra / kerombo antuk Banjar manut pinunas sang miyadnya.

CATURTHAS SARGAH
SUKERTA TATA AGAMA

Palet 1

Indik Dewa Yadnya

Pawos 32

- 1). Palinggih / Panyiwian Desa Adat Dencarik luire :
 - ha. Kahyangan Tiga :
 1. Pura Desa Puseh
 2. Pura Dalem magenah ring palemahan Desa Banjar
- 2). Rahina piodalan ring Kahyangan Tiga sekadi ring sor :
 - ha. Pura Desa Puseh : Anggara Kliwon Wuku Medangsia
 - na. Pura Dalem : Budha Umanis Wuku Tambir
- 3). Upacara Pujawali (piodalan) ring Kahyangan Tiga inucap ring ajeng alit, madia mautama manut kawentenan ring perarem.
- 4). Perade wenten rahina piodalan ring Pamerajan utawi sanggah nyarengin (sinarengan) ring rahina Pujawali ring Kahyangan Tiga patut pangemong Merajan utawi Sanggah inucap ngingsirang dauh, sejawaning yadnya sane mabuat patut mesadok ring Prajuru.

Pawos 33

- (1). Rahina Pelastian ring Desa Adat Dencarik satunggiling sasih kesanga nuju panglong
- (2). Pailen upacara pelastian inucap ring ajeng kawengku anut antuk Krama Desa Adat Dencarik, ngeninin urunan masilih ganti sareng subak sawengkon Desa Adat Dencarik.
- (3). Indik pemargin pretima miwah ampilan rikala pailen upacara Pelastian ke enter antuk Prajuru manut dresta tur tan lempas ring sesulur wiyadin sor singgih
- (4). Perade pangemong penyiwian dadia durung madruwe Pratima kengin ngangge daksina lingga, utawi lingga, manut dresta.

Pawos 34
Sukerta Kahyangan

- (1). Sekancan Candala sane tan dados ngeranjing ke Pura luire
 - ha. Catur Untaka
 - Kelayu sekaran
 - Ngeraja soala
 - Pawiwahan
 - Keembasan oka
 - na. Sato Agung luir sukapat sejawaning rikalaning mapepada
 - ca. Sahanan sane kesinanggeh ngaletihin
- (2). Pratingkahe tan wenang ring Pura :
 - ha. Masumpah (cor) sejawaning pituduh prajuru
 - na. Mamisuh, masesenengan, makolem dados asiki lanang wadon, mewarih, nyangsang busana Ida.
 - ca. Mungghah tedun ring perahyangan (pelinggih) sejawaning pituduh prajuru
 - ra. Perade mamurung kecape ajeng wenang kapidanda penyangaskara olih prajuru (sang rumawos desa).
- (3). Perade wenten jadma ngerusak perahyangan, bilih - bilih gumanti ngerereh arta (memaling) wenang jadma inucap katiwakin pamidanda penyangaskara tur keserahang ring sang pematut .
- (4). I Krama Desa Adat Dencarik satunggiling ngeranjing ke Kahyangan Desa utawi genah suci siosan pacang ngamiletin Upacara Yadnya mangda ugi mabusana jangkep manut deresta.

Pawos 35

- (1). Perade wenten jadma kerawuhan (tedun) ring Pura kengin kepintonin perade rumasa kesumangsayan, yan tan wyakti (ngawe - ngawe) patut kasisipang tur kegingsirang saking genah yadnya (upacara)
- (2). Perade Kahyangan kehanan durmenggala minakadi kepanca bhaya, pemangku wiyadin sang ngemanggihin patut digelis nyadokang ring Prajuru mangda gelis ketitenin sepatutnia.

Pawos 36

- (1). Ring soang - soang Pura inucap patut kawentenang pemangku lanang wiyadin istri
- (2). Ngadegang Pemangku mangda manut dudonan :
 - ha. Ngewaris ngewilang saking turunan, sane sampun grehasta
 - na. Kecatri antuk Krama Desa taler sane sampun mekrama tur sampun polih penyingaskara saking pawijilannia.
- (3). Sane tan wenang keadegang dados pemangku :
 - ha. Candala luire : peceng, perot, muang ceda angga seosan
 - na. Ulah cacad luire : angrabining wong arabi, mitra ngalang muang ceda angga seosan, utawi cacad patunggilannia
 - ca. Kegeringan luire : sakit ila, ayan, buduh muang penyungkan petunggilannia
 - ra. Tan uning ngewacen lan nyurat aksara
- (4). Prebeya ngadegang pemangku patut saking ikrama Desa
- (5). Pemangku patut misinggihang sesanan Pemangku
- (6). Yan perade murug, patut pemangku inucap keperayascita, manut agama ageng malit pamuruge
- (7). Perade pemangku inucap nilar sesana patut kausanang.

Pawos 37

- (1). Swadarmaning pemangku :
 - ha. Ngantebang upacara yadnya sekasidannia ring Khayangan Desa muang ring amongannia
 - na. Nuntun saha nitenin kesucian Khayangan
 - ca. Perade wenten kerama Desa ngaturang uninga ring Kahyangan Desa patut kapuputang / ke enter olih pemangku Kahyangan inucap.

Pawos 38

- ha. Pituas (pikolih) pemangku apah tiga saking sesari upacara
- na. Dasar suci ritatkala piodalan
- ca. Luput ayahan sami tategenan Desa miwah Banjar
- ra. Pituas seosan manut pamutus tetimbang prajuru (perarem)

Palet 2

Indik Rsi Yadnya

Pawos 39

- (1). Sang pacang Mapodgala / madeg pandita (madiksa) patut nunas palugrahan ring sang rumawos minekadi : Prajuru Desa Adat, Parisadha Hindu Dharma, Departemen Agama.
- (2). Prajuru patut sareng nureksa, nitenin mangda sesulur muang pemargine wiyakti manut kecap castragama saha tinut nyaksinin upacara padiksaan.
- (3). Selanturnia Prajuru Desa patut gelis ngentosin parab sang mediksa manut panugrahan sang Nabe, saha kailikitayang tur kapidartayang ring paruman Desa Adat.

Pawos 40

- (1). Sane pacang madeg dados Pinandita patut masadok ring prajuru miwah PHDI
- (2). Prajuru Desa Adat patut / wenang nitenin, nureksa tur ngalangin parade cihna sasar ring sesana muang candala siosan.
- (3). Prajuru patut nyaksinin saupekarannia muang midartayang ring paruman Desa, tegep rawuhing wates kawenangannia ngenterang upacara yadnya.
- (4). Prade wenten wiku nilar sesana, patut kasadokang ring sang rumawos tur ikrama di gelis ngwentenang pamutus prarem.

Pawos 41

- (1). Krama Desa katuntun antuk Prejuru Desa sareng ngawas nitenin mangda sahanan upacara yadnya sane kapuput antuk Pandita wiyadin Pinandita (Pemangku, Dalang, Sangging, Balian) manut kewenangannia

Palet 3

Indik Pitra Yadnya

Pawos 42

- (1). Indik pemargin Pitra Yadnya madudonan pangupekarannia mekadi ring sor :
 - ha. Mapendem
 - na. Makinsan ring ageni
 - ca. Atiwa - tiwa (ngaben)
- (2). Ngutang waledan (kotoran sawa) mangda luaran ring dauh 3 (wengi) tur sampun kekaryanang belungbang ring setra.
- (3). Yening wenten krama, magenah doh saking setra, kengin ngutang banyeh ring pekarangan ngeraga.
- (4). Prade mamurung wenang katiwakin pamidanda manut perarem.
- (5). Tan wenang mendem wiadin ngeseng sawa sejawaning ring setra.
- (6). Tan kalugra mitrayadnya ring rahina :

Purnama, Tilem, Perwani, Kalagotongan, semut sadulur, pasah, Tungleli, Paniron, Kliwon muang rahina suci seosan.
- (7). Yan ngeseng sawa mangda ngimpasin Yama kalawan Guru.
- (8). Tan kalugra ngeraksa sawa ritatkala jagate keberebehan (gerubug)

- (9). Tan kengin mekarya bangbang sadurung pastika pacang mapendem.
- (10). Pepaga, selepa, muang piranti sane siosan patut kegeseng riusan mepeilen upakara kemargiang.
- (11). Perade mamurung kecaping ring ajeng wenang katiwakin pamidanda manut perarem.
- (12). Yan perade wenten sinalih tunggil Kerama Desa seda ring jaba Desa Pakraman Dencarik sawania dados kabakta antuk ring Desa Pakraman sajeroning pacang matusang bebawos ring keluargannya saha meresteka.

Pawos 43

- (1). Indik bacakan kepejahan :
 - Ha. Salah pati
 - Na. Ngulah pati
 - (1). Indik kelayu sekaran salah pati, ulah pati, kebengawan dados kapresteka kewanten kadulurin antuk upacara penebusan ring genah seda, perempatan, cangkem setra.
 - (2). Yan perade pemangku Kahyangan Desa kepunggelan yusa, tan wenang kependem, upacarannyane kerombo antuk krama Desa sanistanya banten prayastita, yan perade keluarga mangku inucap presida ngelaksanayang upacara, krama desa wantah mapitulung.
 - (3). Pemargin atiwa - tiwa ke epah dados kalih pawos luire :
 - ha. Ngaben dadkan
 - na. Ngaben ngemasa (royongan)

Pawos 44

- (1). Keluarga sane maderuwe antaka (kepademan) patut sekadi ring sor :
 - ha. Mesadok ring Prajuru Desa Pekraman
 - na. Nunasang dewasa ring Ida Sang Pandita utawi ring Prajuru Desa.

- ca. Prejuru Desa / Banjar Adat patut midartayang antuk cihna suaran kulkul utawi nyuratang ring papan Banjar Adat sane wenten ring soang - soang Banjar Adat.
- 2). Keluarga sane maderuwe antaka (kepademan) sakewanten tan sareng mekrama Desa Adat ring Desa Adat Dencarik, tan kawenangang mendem wiadin ngeseng sawa ring setra paderuwen Desa Adat Dencarik, taler sane kaderuwenang antuk Desa Adat Banjar, Banjar Tegeha.
- 3). Swadarma Krama Desa / Banjar Adat :
- ha. Maritetes paetangan pemargin upacara
- na. Krama lanang istri patut nyarengin mekarya indik eteh - eteh (pailen) upekara tur nyarengin nututin rauh ke setra.
- ca. Tan kelugra ngumpag - ampig watangan ritatkala ngusung sawa, bilih - bilih ngerusak wangke.

Pawos 45

- (1). Parade wenten jadmah katiban pejah (seda) sajeroning kantong mobot, patut hobotane (rarene) ke emasang dumun ring rumah sakit, wus punika wenang kapresteka manut pretingkahing pitra yadnya.
- (2). I Krama Desa Adat Dencarik, tan kawenangang ngewehin upacara petatahan ring sang sampun antaka (seda).

Palet 4

Indik Manusa Yadnya

Pawos 46

- (1). Manusa Yadnya inggih punika : Upacara upakara darmaning manusa ngawit saking patemoning kama petak kelawan kama bang jantos kawekas.
- (2). Upekara inucap ring ajeng madudonan sekadi ring sor :
- ha. Magedong - gedongan inggih punika :
Upekara upacara duk ngerempini

- na. Sang kameraka medal (mas rare)
 - ca. Kepus wed
 - ra. Tutug kambuhan
 - ka. Nigang sasihin (3 bulan / 105 hari)
 - da. Pawotonan (odalan), mapetik, megunting
 - ta. Tumbuh gigi (ketus untu) matusuk ring karna
 - sa. Tutug kelih (ngeraja wadone, ngembak lanange)
 - wa. Mepandes (metatah)
 - la. Pawiwahan
 - ma. Pawintenan (Ekajati muang dwijati)
- (3). Krama Desa tan kawenangang mawehakna sahanan upacara upakara (Panca Yadnya) ring jadma sios Agama, sajroning durung saking sujati ngegem Agama Hindu yan parade wenten mamurung wenang katiwakin pamidanda.

Palet 5

Indik Bhuta Yadnya

Pawos 47

- (1). Bhuta Yadnya inggih punika : Upakara upacara pabiakala muang pecaruan ring pertiwi, Kahyangan, ring Manusa muang ring bebutan.
- (2). Upacara pabiakala ring sarwa Peranine luire :
 - Ha. Ring sarwaning tumbuhan rikala Tumpek Pengatag
(Saniscara Kliwon Wariga
 - na. Ring sarwa ingon - ingon rikala Tumpek Anadang
(Saniscara Kliwon Uye)
 - ca. Lelandep sarwa besi ring Tumpek Anandang
(Saniscara Kliwon Landep)
 - ra. Upacara pabiakalan manusa anut widana kebawos Bhuya Kala
 - ka. Upacara unen - unen (wewalian) ring Saniscara Kliwon (Tumpek Wayang)
- (3). Upacara mabya kala ring pertiwi, Kahyangan lan babutan ketah kebawos mecaru, alit madia mautama sekadi ring sor puniki :
 - ha. Eka sata

- na. Panca sata
 - ca. Panca kelud
 - ra. Rsi Gana
 - ka. Tawur Agung (Balik Sumpah, Eka Dasa Rudra, Eka Buana, MSI)
 - da. Miwah sarwa kadurmanggalan
- (4). Sejawaning ring ajeng patut kawentenang upacara upekara luire :
- ha. Ngejot (yadnya sesa) nyabran rahina wusan ngerateng
 - na. Masegeh manut genah muang rerahinan
 - ca. Ring pamedal geria (jero) nyabran tilem antuk panca warna
 - ra. Mesesapuh rikala pujawali ring Kahyangan, utawi genah suci seosan.

Pawos 48

- (1). Nyabran ngewarsa nuju tileming kesanga kawentenang Tawur Kesanga, sane ketah kebawos Ngerupuk makécihna pacang magpag rahina Penyepian.
- (2). Upacara Ngerupuk sane kemargiang antuk Kerama Desa, makecihna anggon serana nyuciang palemahan saking sarwa bebhutan (kala).
- (3). I Kerama Desa / Banjar sami sampun kasinanggeh uning saha nganutin deresta, sima laksana Desa Adat Dencarik minekadi
 - ha. Tan medal kemargine
 - na. Tan medamar rikala wengi rikala sipeng
- (4). Upacara ring rahina Nyepi (sipeng) nganut catur beberatan sekadi ring sor :
 - ha. Amati geni inggih punika : I Kerama Desa tan kelugra meapi - api (sekala niskala.
 - na. Amati karya inggih punika : I Kerama Desa tan kelugra mekarya.

- ca. Amati lelangan inggih punika : I Kerama Desa tan kelugra maseneng - seneng lan maswara geger.
- ra. Amati Lelanguan : I Krama Desa tan kelugra mamargi
- (5). Beberatan inucap ring ajeng kejejerang ngawit semeng dauh (3 (tiga) jantos benjang dauh 3 (tiga) tepet ngembak geni, karya wastu ngelukar yoga semadi kadulurin antuk idep nunas rahajeng muang ngaksamayang soang - soang kerama ring Desa Pakeraman maka ngawit Icaka warsa.
 - (6). I Kerama Desa sajeroning nyanggra rahina ngembak geni patut satuwuk mingukuhang Adat Deresta kuna minekadi nyakan diwang (meratengan jabaan jero / geria utawi sisin margi) wanteh araina semeng kelawan sore.
 - (7). Sejawa Ida Sang Pandita muang Pinandita, I Krama Desa mangda ugi nganutin gegaman sekadi inucap ring ajeng, yan parade mamurug wenang kapidanda.
 - (8). Wewangunan pawon (pewargan) inucap mangda ketitenin sekadi ring sor.
 - (9). Prejuru Desa Adat Dencarik, ngawentenang pamutus bebawos ring jadma sane memurug beberatan penyepian minekadi pamidanda, sejawaning kelugrahin ilikita seantukan keni pakeweh nadak muang pakeweh sane seosan.

PANCAMAS SARGAH
SUKERTA TATA PAWONGAN

Palet 1

Indik Pawiwahan

Pawos 49

- (1). Pawiwahan inggih punika patemoning purusa lawan peredana, malarapan antuk penunggalan kayun suka cita kedulurin upeksi sekala niskala
- (2). Pemargin pawiwahan lui e:

- ha. Pepadikan meduluran antuk suka cita sangkaning paigum pekaryan kuluwarga sang kalih.
- na. Ngerorod (memaling) : melarapan antuk suka cita lanang istri, wates pejati arahina awengi.
- ca. Yan wenten ngambil wiadin keambil saking dure Desa patut mesadok ring Prejuru Desa Adat, Kelian Desa Adat.
- ra. Yan wenten pengetut saking kuluwarga sang wadon patut masadok ring Prajuru Desa Adat.

(3). Kapatutan Pawiwahan :

- ha. Sampun nungguh Deha / Teruna, manut Undang - undang No. 1 Tahun 1974
- na. Tan wenang ngerangkatang (ngambil) tumin dinyama, oka, ponakan ngarep, semeton sodet, semeton sewos ibu, muang saluiring sane matunggalan susu.
- ca. Yan wenten angrabining wong arabi wenang katibakin pemutus pamidanda tur katurang ring sang Amangkurat

Pawos 50

- (1). Pawiwahan sane kemanggehang ring Desa Adat Dencarik, indik pawidi widana kapuputang antuk sang wenang mamuput karya utawi Ida Sang Sulinggih.
- (2). Kasaksinin antuk :
 - ha. Prejuru Desa Adat pinaka manusa saksi
 - na. Dewa saksi (pawidi - widana)
 - ca. Bhuta sakti (makalah - kalah) bea kawon
- (3). Yan tan nganutin sekadi kecap ring ajeng, durung kewastanin puputing yadnya pawiwahan, tur manggeh sebel kandel.
- (4). Kailikita antuk surat pawiwahan / akte perkawinan.

Pawos 51

Indik Pawiwahan Predana Nyerod

- (1). ha. Wenang mepati wangi
na. Kesaksinin antuk Prajuru Desa Adat
ca. Sadurung upecara mepati wangi kemargiang, nganten inucap tan prasida weh
akena pekalah - kalahan.

Pawos 52

- (1). Piteges pawiwahan, sang patut merabi adiri, sejawaning wenten pasubaya saking
rabine utawi paetangan bebawos pacang merabi malih.
- (2). Parade wenten anak istri mobot tan keangkenin, patut kaupacara olih
reramannyane.
- (3). Yan wenten lanang wadon durung merabi, sakewanten pratingkahe sekadi
makurenan lintang arahina patut karampag tur kabaosin antuk Prajurune.

Palet 2

Indik Nyapian

Pawos 53

- (1). Yan wenten Kerama palas merabian, patut kapuputang ring Pengadilan sanistania
sampun ketatas antuk Prejuru Desa Adat Dencarik.
- (2). Usan merabi seantukan sinalih tunggil ngaonin seda.
- (3). Palas merabian sangkaning ngawit wewicara tan suka cita penunggalan idep.

Pawos 54
Tata cara Palas Merabian

- (1). Naur pamidanda akehnia 100 kg beras
 - ha. Parade palase pada lila, pamidandania ketaur pada meparo
 - na. Parade palase mawiwit saking sang lanang, pamidandania ketaur antuk sang lanang
 - ca. Parade palase mawiwit saking sang wadon, pamidandania ketaur antuk sang wadon

Pawos 55

Parade riwekas sang palas merabi kecihna adung malih, patut ngelaksanayang pawiwahan malih.

Pawos 56

- (1). Sang balu kabinayang dados :
 - ha. Balu luh wit sentana (sentana rajeg) miwah balu luh boya sentana.
 - na. Balu lanang kepurusa (wit sentana) miwah balu lanang nyeburin (boya sentana).
- (2). Swadarmaning balu inucap patut :
 - ha. Ngemanguhang patiberata, tan kangin ngemargiang paradara / dretikerama
 - na. Mupunia waris pagunakaya, tan dados ngadol, ngadeang, makidihang lan seosan punika, sejawaning kebebasang saking pianak utawi kulewarga pinih tampek saking kurunannya, parade pianak kantun alit - alit.
 - ca. Kengin ngidih sentana parade wenten pidabdab sadurung sinalih tunggil padem, saha kabebasan antuk kuluwarga singgih kepurusa
 - ra. Kawenangang mawiwaha malih parade wenten kebebasan antut angka aksara ring ajeng.

Pawos 57

Balu kaucap tan pageh sekadi ring sor :

- ha. Drati kerama utawi paradara
- na. Matilar saking pakubon tan pesadok jantus 7 rahima (awuhin)
- ca. Lempas ring swadarma seos - seosan, tan puresida ngesahin salah.

Pulet 3

Indik Sentana

Pawos 58

- (1). Sentana wenten kalih pawos, sane kaucap prati sentana miwah sentana peperasan.
- (2). Peratisentana inggih punika sentana sane metu saking pawiwahan, kaguan.
- (3). Parade pawiwahan tan keputut, ngewetuang sentana, mangda tan kaman kewanstanin bebinjat utawi astra yogia kemanggala antuk penganggara.
- (4). Parade pawiwahane tan ngemetuang sentana, kengih ngidih sentana antuk ap...
sekala niskala sane kewanstanin sentana peperasan.
- (5). Sentana rajeg inggih punika prati sentana waden (prehana) sane ngemanggehang lanang (purusa) tur risampun ngelaksanayang pawiwahan ngidih.
- (6). Sang sane dados kearsayang sentana rajeg macap mawit nomer lima (5) inggih ajeng punika :
 - ha. Sinalih tunggil sentana istri / waden.
 - na. Sampun kemanggehang dados prati sentana lanang (purusa)
 - ca. Pawiwahan keceburin kewanstaning antuk jaha sane maguna dionan sane sampun ngelaksanayang pamaritaha raga mawi sudiwadhani
 - ra. Sane manggehang sentana rajeg para mupradok ring prajon Banjar tan Kellan Banjar para nyawang ring Banjar udu ngawang ring prajon Dasa Adat.

Pawos 59

- (1). Ngangkat sentana manut dudonan patut makecihna arta berana pemerasan sane keupesaksiang sekala niskala, lan katunasang pamikukuh ring Guru Wisesa.
- (2). Sapa sira ugi kerama pacang ngidih sentana patut mesadok ring Prejuru / Bendesa Adat senaistania asasih sedurung pemerasan.
- (3). Bendesa adat kesarengin antuk Kelian - kelian Banjar Adat nyiarang ring sewidangan Desa Adat sang sapa sira ugi rumaksa tan lila mangda nyadokang masenger kalih uku sedurung pemerasan ring Bendesa Adat Dencarik.
- (4). Prejuru / Dulun Desa digelis mawosin saha ngicenin pemutus nepek ring dresta miwah ring perarem.
- (5). Parade sulur peperasan tan manut ring kecaping ajeng, Dulun Desa wenang ngadeg sang pacang mekarya, saha ngicenin penuntun, mangda kepuputang riyin sulur bebawos utawi wicarannya.

Pawos 60

- (1). Peperasan sane kepatut ring Desa risampun makecihna :
 - ha. Widi widana pemerasan
 - na. Kesaksinin antuk Dulun Desa sane makelingang utawi ngilikitayang tur kesiarang ring wewidangan Desa.
- (2). Sane kepatut peras angge sentana sekadi ring sor :
 - ha. Jadma megama Hindu
 - na. Pepernahan nedunang saking sang meras
 - ca. Kuluwarga saking purusa, parade tan wenten kengin saking wadon, yening taler tan wenten, wau kengin sekama - kama (saking kayun).
 - ra. Keutamayang saking waris pancer, purusa
 - ka. Sinalih tunggil mawiwit saking kuluwarga tunggal sanggah utawi merajan, paibon lan dadia utawi ngambilin anak seos sakewanten sang megama Hindu.
- (3). Kengin ngangkat sentana langkung ring adiri, lanang wiadin wadon.

Palet 4

Indik Wewarisan

Pawos 61

- (1). Wewarisan inggih punika tetamian arta berana saha ayah - ayah ngupadi sukerta sekala niskala saking keluhurannia arep ring turunannya.
- (2). Kang sinanggeh wewarisan luire :
 - ha. Due tengah, mekadi negak ayahan Desa, Kahyangan, pusaka siwa kerana
 - na. Pemerajan kemulan
 - ca. Peguna kayan, tadtadan / jiwa dana, hutang piutang
- (3). Wau kengin kebawos wewarisan parade wenten :
 - ha. Sang mapiturun (wewarisan)
 - na. Keturunan (Akhli waris)
 - ca. Arta berana muang tetegenan (ayah - ayahan) mecihna wewarisan

Pawos 62

- (1). Pewaris sane ngewarisin luire :
 - ha. Preti sentana purusa
 - na. Preti sentana perdana (sentana rajeg)
 - ca. Sentana peperasan lanang
- (2). Parade tan wenten sekadi ring ajeng, kang sinanggeh pewaris :
 - ha. Turunan purusa pepernahan ngunggahang rerama lanang, pekat selantur ipun rerama misan mindon.
 - na. Turunan purusa pepernahan kesamping sekadi keponakan miwah mindon.

Pawos 63

Swadarma sang ngewarisin patut :

- ha. Nerima saha ngusayang tetamian pahan saking kaluhurania, mekadi ngerempon sanggah, Pura saha pangupakarannia miwah nyeledihin ayah - ayahan pewaris.
- na. Ngabenang pewaris saha ngelanturang upacara - upacara pitra
- ca. Nawurin hutang - hutang pewaris sane manut pengelokita.

Pawos 64

Pengepahán waris manut sekadi ring sor :

- ha. Risampun ngelaksanayang Pitra Yadnya lan hutang - hutang pewaris tuntas ketawur.
- na. Sang ngewarisin polih pah - pahan pada sangkaning pegunakayan.
- ca. Sinalih tunggil sang ngewarisin kengin tan polih pahan parade :
 1. Nilar kawitan lan sesahaning agama
 2. Sentana rajeg kesah wewiwaha utawi preti sentana nyeburin, soang - soang kebawos ninggal kedaton.
- ra. Boya pangwaris kengin muponin hasil manut dudonan luire :
 1. Sentana luh, selami dereng kesah mawiwaha
 2. Balu luh wiadin lanang nyeburin (soang - soang boya sentana)
 3. Mulih kedeha utawi teruna, riantukan ring pawiwaha pecak sampun kebawos nilar kedaton.
- ka. Pewaris kengin maweweh rikala maurip pinaka jiwa dana, tadtadan / bekel makecihna paweweh ring pianak sane kesah mawiwaha.

Pawos 65

- (1). Parade wenten karang kaputungan patut kadruwe oleh Desa.
- (2). Parade sinalih tunggil wenten kerama Desa camput / putung ketiban antaka tur tan wenten kuluwargania sane patut ngodag, kawengku olih Desa Adat Dencarik
- (3). Sekancan paderuwenia patut keranjingang ring deruwen Desa risampun sapretekanya.

**SASTHAS SARGAH
WICARA LAN PAMIDANDA**

Palet 1

Indik Wicara

Pawos 66

- (1). Sane wenang mawosin sekadi mutusang wicara ring Desa Adat Dencarik, inggih punika Prejuru kang sinanggeh Kerta Desa.
- (2). Parade sang mawicara tan wenten cumpu ring pamutus Prejuru, kang sinanggeh Kerta Desa, kengin nunasang wicara inucap ring guru wisesa utawi ring sang rumawos.

Pawos 67

- (1). Sahanan wicara mawiwit kecorahan saha luire sinanggeh nungkasin daging awig - awig paswara miwah perarem Desa / Banjar Prejuru patut digelis mawosin tan malih nyantos pesadok.
- (2). Sejaba wicara sekadi ring ajeng patut nyantosin pesadok sang nunas bawos.
- (3). Penepas patut pastika nyantenang iwang patut, melarapan daging Tri Hita Karana (Saksi, Bukti, Ilikita) miwah tan maren nepak ring Catur Dresta.

Palet 2
Indik Pamidanda
Pawos 68

- (1). Desa / Banjar Adat wenang niwakang pamidanda ring warga Desa sane sisip.
- (2). Peniwak inucap kelaksanayang olih Bendesa / Kefian Banjar Adat
- (3). Bacakan pamidanda luire :
 - ha. Danda arta (danda saha panikel nikelnia) miwah panikel - nikel urunan
 - na. Rerampagan
 - ca. Kedaut karang ayahnia
 - ra. Kasepekang
 - ka. Penyangaskara
- (4). Pamidanda sane katiwakang patut mesor singgih manut ring kesisipan
- (5). Jinah utawi rajaberana pamidanda ngeranjing dados deruwen Desa (ring Banjar Adat).

Pawos 69

- (1). Kerama sane langkung ring 3 (tigang) paruman ngelantur tan naur urunan miwah dedandan wenang kerampag.
- (2). Rerampagan manut sekadi ring sor :
 - ha. Kelaksanayang antuk Prejuru (Pecalang), tur kasarengin antuk dulun dadia, manut upesaksi.
 - na. Sang ngerampag sangkaning narsana ngambil barang utawi nyawenin tanen tuwuh akehnia manut hutang sang kerampag.
 - ca. Prejuru mitekekang mangda barang - barang dane kerampag digelis ketawur wewaneng awuku ring kutus rahina pacang keadol.
 - ra. Tan ngeninin saluiring barang sane patut tinggalang manut agama miwah mademang pangupa jiwa sang kerampag.

Pawos 70

- (1). Parade sang pacang kerampag angewara (ngalangin) pelaksanan inucap mewastu sampun tan nganutin awig - awig Desa wenang karang Desa sane kagenahin kedaut antuk Desane.
- (2). Semalih yan purun taler ngalangin pelaksanan kadi ring ajeng jadma inucap wenang kasepakang antuk kerama Desane.
- (3). Pamidanda inucap ring ajeng kasinangguh Buntas risampun sang kakeninin (ketiwakin) :
 - ha. Nunas geng pengampura ring Kerama Desa Adat seantukan nguak pasubaya (perarem pecak).
 - na. Naur pengargan penguak pasubayania, duk pacang kerampag kadulurin perayascita penyaksat kaiwangannia ring Desa.

SAPTAMAS SARGAH NGUWAH - NGUWUHIN AWIG - AWIG

Pawos 71







- (1). Nguwah - nguwuhin Awig - awig Desa Adat puniki kelaksanayang antuk paruman Desa.
- (2). Paruman inucap mangda kdasarini olih / antuk pekarsan I Kerama Desa.
- (3). Pamutus bawos mangda kdasarini antuk *gilik saguluk* (perarem).

Pawos 72

- (1). Sekeluiring sane wenten sederengnya patut kemanggehang.
- (2). Sekeluiring sane pacang kekaryanin / kewangun manda katepekang ring daging awig - awig.
- (3). Sekeluiring sane durung kehawos sajeroning awig - awig, punika patut kelaksanayang manut tata cara sane sampun memargi, kadulurin antuk pararem - pararem.

ASTHAMAS SARGAH
PAMUPUT
Pawos 72

- (1). Awig - awig puniki kacumponin / kaadungin antuk Kerama Desa Adat Dencarik tur
Kapasupati :
Duk tanggal : 8 Juli 2003
Rahina : Anggara Kliwon
Wuku : Medangsia
Sasih : Kasa
Isaka : 1925
- (2). Sekeluring sane nenten nganutin ring daging awig - awig puniki, nenten dados kemanggehang.
- (3). Sekeluring sane durung kebawos sajeroning awig - awig puniki, pacang kebeligbagang antuk pararem.
- (4). Awig - awig puniki ketingga tunganin antuk :



Salinan
dikirimkan
pada tanggal
2003
Juli 2003